

靜

志

居

詩

話

靜志居詩話卷十七

秀水朱竹垞先生著

扶荔山房編輯

錢龍錫字稚文號機山松江華亭人萬歷丁未進士授編修歷中允諭德以少詹掌南京翰林院升禮部尚書東閣大學士召進文淵閣加太子太保致仕歸尋逮繫詔獄論斬得釋戍定海衛久之還里卒于家有菟餘存橐

公始入閣思陵命定附魏璫諸逆臣案出黃羅囊示之且曰忠賢一豎何能爲皆外庭力爲詔諛至此囊中章

疏悉嬾奄人實蹟也公乃取以論罪分別重輕凡六等又慮罪人狡辯因請于諸臣姓名下各注所犯俾服其心逆案既定黨人銜怨刺骨袁崇煥經略遼東入見帝大言期以五年奏功公疑焉退而詣之曰子方略將何如對曰不外東江關寧兩路進兵爾東江者島帥毛文龍也公曰舍關寧實地而問海道何與對曰譬如奕然局有四子東江其一也可則用之不可則有以處之崇禎二年五月崇煥行邊至雙島召文龍至以餉金十萬犒其師自與文龍登舟相視山海形勢酒間勾隊島帥

麾下以邊警報者踵至崇煥乃疑曰吾軍亦有偵探卒  
何以不一至此速吾行爾起數其跋扈按尙方劒斬之  
聲其罪置帥而返全軍莫敢譁也及大安口失事都城  
被圍崇煥勤王師至廷臣多言崇煥之殺文龍陰爲主  
款地思陵大疑尋有旨俾縋城入下之獄訊叛狀於是  
御史高捷劾公與袁同謀崇煥旣誅御史史堃劾公逮  
繫詔獄論斬有司設厰于西市將用夏言故事旣而緩  
決左中允黃道周給事中劉斯璠先後爲公訟寃得釋  
戍定海衛居戍所九年乃還崇煥之死詳載本朝實

錄操史筆者不可不知

楊漣字文孺應山人萬歷丁未進士除常熟知縣  
徵授戶科給事中歷禮科都給事中升太常少  
卿擢右僉都御史進副都御史死璫禍贈太子  
少保左都御史諡忠烈有集

六君子被逮周

朝瑞袁化

顧三公以五月到北司魏楊左

三公以六月到北司比較之日六君子伏檐溜下楊居  
中左居楊之左魏居楊之右顧居魏之右周居左之左  
袁居周之左許顯純初猶作爾汝稱旋竟呼名叱咤獄

吏有稱犯官者顯純怒罵曰此等犯人爾何官之有其  
刑具有械有鐐有棍有杓有夾棍遇比較流血灑地楊  
左魏三公先斃次袁次周次顧投繯而逝是年六月詔  
獄土地祠前樹下生一黃芝六君子至日光彩映人環  
視適六瓣見者疑吉兆顧公歎曰芝瑞草也而生于獄  
其妖乎未幾六君子皆斃于獄楊公之歸櫬也負以二  
騾其子及一二蒼頭徒跣道上行路皆爲飲泣云

左光斗字共之桐城人萬歷丁未進士授中書舍  
人擢浙江道御史升大理寺丞進少卿終左僉

都御史死璫禍贈太子少保右副都御史諡忠

毅有集

萬忠貞之死忠毅哭之以詩有云我有白簡繼君何能  
已與君同游杖下矣丹心畱在天壤間默默之生不如  
死是亦不媿其言者也詩多晚唐風韻如溼雲畱野樹  
晴雪照征衣凍犬迎人返飢烏下食齊一觴邀老友隨  
意發新歌過雨煤錢長將炎水價添野牆藤蓋瓦邨落  
樹爲橋問節驚初度思親改歲華疲驢衝道路破帽出  
都門宛然鄭都官姚少監遺格

顧大章字伯欽常熟人萬歷丁未進士除泉州推官改補常州府學教授稍遷國子博士轉刑部主事歷禮部員外郎出爲陝西按察副使被逮卒于獄贈太僕寺卿諡裕愍

楊忠烈攻魏忠賢人疑具草者繆文貞王莊毅攻客氏人疑具草者顧裕愍此兩公所以不免也裕愍與弟大韶仲恭時義妙絕時人詩特具體而已被逮道經故里門云檻車塵逐使車轅一路知交盡掩門猶喜多情今夜月斜窺樹隙照離尊



許令典字稚則海寧人萬歷丁未進士官至淮安

知府有靈泉羸史集

稚則一官不達意薄淮陽散髮歸田陶潛之屋不豐范  
蠡之舟偏小簋與竹杖紙帳繩牀雅饒樂趣所云愛官  
何似愛吾廬也詩取適意無意求工蓋本於香山擊壤  
題陳平叔陋巷云狹巷難容旋馬小池也愛籠鵝客來  
兒子教揖興到老人自歌

徐從治字肩虞海鹽人萬歷丁未進士除桐城知  
縣改武學教授轉國子助教遷南禮部主事歷

郎中出知濟南府以山東按察副使分巡兗東  
以布政司右參政分巡濟南加右布政使請告  
歸起薊州兵備道尋加左布政使復移病歸再  
起山東武德道兵備超拜都察院右副都御史  
巡撫山東萊州被圍中飛礮死事聞贈資善大  
夫兵部尙書賜祠曰忠烈有集

徐公平白蓮賊擒其魁徐鴻儒脅從四萬六千餘人悉  
赦罔治其奉命填撫山東詔駐青州而公以叛軍將掠  
萊州特與防撫謝璉治守城具三宿而寇大至固守七

月爲礮石碎顱殞于城上合乎以死勤事之祀典矣公  
孫曰全曰令均有文采以公遺詩三篇見示因錄其一  
反覆誦之不異張中丞接戰春來苦孤城日漸危裹瘡  
猶出陣飲血更登陴之句也入萊州城被圍作云崇禎  
五年春帝命師中錫俾撫大小東星言事羈勒於時二  
月朔告警曉羽檄叛軍無安巢掠地恣所歷萊牧實要  
衝羣兇首豐陽雖有防守臣敵甲同袒裼詔許駐青州  
欲往寸心慙萊民亦吾民不忍付焦溺單車指危邦夫  
豈尚沾激須臾寇果臨疾風走沙礫孤城露南隅三面

受鋒鏑雲梯匪一層地道發重甃捷如猱升木多於螳  
緣壁穴以穢熏戶臺縱火燔荻相隨八十騎騎奮長  
矜自顧一書生乃當萬人敵援兵絕虬蟄礮石轟霹靂  
誰與生厲階失計遂貽憾一星燄不撲燎原衆斯惕兩  
葉生不除須用斧柯析奈何肉食謀議撫不議擊養癰  
久必潰累卵危終殞哀哉此邦人何讐委虺蜴效死職  
所甘智已窮墨翟

錢文薦字仲舉慈谿人萬歷丁未進士知新野宜

春二縣人爲工部主事有麗囑樓集

仲舉論詩升少陵於堂置之首座青蓮次之高岑王孟  
又次之餘子隅坐侍酒而已自謂吾輩於此不可不占  
一坐否亦須坐兩廡中聆鐘磬管絃之盛然觀其製作  
未免懦鈍譬之於樂僅比於祝敔柷楊焉爾至駸顧茂  
齊謂少陵詩窮後工以爲非是詩至少陵窮固工不窮  
亦工也斯言得之

趙嘏字子函一字屏國盩厔人萬歷己酉舉人

子函好古撰石墨鐫華關中金石藉其題識詩不見醜  
尙存康王遺格茂陵一律云黃山歷盡見孤城城上高

橫眼倍明芳樹寢園今北望暮雲宮闕舊西京芙蓉晝  
冷仙翁露苜蓿春閒宛馬聲回首長楊誇獵地何人得  
似子雲名

張慎言字金銘陽城人萬歷庚戌進士官至吏部

尙書有泊水齋集

尙書雖歷崇階傾心下風雅之士聞詩人陳昂拙屢布  
卦卒窮以死語所知曰自今入市門見賣菜傭皆宜物  
色之恐有如白雲先生其人者嗚呼今人論撰述率先  
揆其仕路之通塞以定文字之佳惡取舍由茲分焉江

河日下安得聞此長者之言

文翔鳳字天瑞西安三水人萬歷庚戌進士除萊陽知縣調伊陽再調洛陽遷南禮部主事調吏部升山西提學副使入爲光祿少卿有伊川海日雲門諸集

學有異端詩亦有異端文太青王季重是已望唐陵云北望唐家十八陵寢園貴主亦相仍惟將憲廟除樵採不爲明皇具禴蒸幸蜀山川幾板蕩平淮天地再清澄奉先橋首堯山好柏路遐探憾未能

鍾惺字伯敬景陵人萬歷庚戌進士除行人升工部主事改南京禮部主事進郎中遷福建提學僉事有隱秀軒集

禮云國家將亡必有妖孽非必日蝕星變龍蛇雞禍也惟詩有然萬歷中公安矯歷下婁東之弊倡淺率之調以爲浮響造不根之句以爲奇突用助語之辭以爲流轉著一字務求之幽晦構一題必期於不通詩歸出而一時紙貴閩人蔡復一等旣降心以相從吳人張澤華淑等復聞聲而遙應無不奉一言爲準的入二豎於膏



育取名一時流毒天下詩亡而國亦隨之矣舟晚五律  
云舟樓頻易處水宿偶依岑岍暝江逾遠天寒谷自深  
隔墟烟似曉近峽氣先陰初月難離霧疎燈稍著林漁  
樵昏後語山水靜中音莫數歸鴉翼徒驚倦客心送邱  
長孺赴遼陽云曲突何曾勸徙薪烽烟桴鼓重邊臣全  
遼三五年中事爛額焦頭半楚人

王志堅初字弱生更字淑士崑山人萬歷庚戌進  
士授南京兵部主事歷郎中以按察僉事提學  
貴州不赴再起提學湖廣卒于官有香巖室草

附錄愚山云淑士讀書最爲有法先經而後史先史而後子集其讀經先箋疏而後辨論讀史先證據而後發明讀子則謂唐以後無子當取說家之有裨經史者以補子之不足讀集則定秦漢以後文爲五編尤用意於唐宋諸家碑志援據史傳摭采小說以參覈其事之異同文之純駁其所著篇章甚富顧自定詩才七十餘首其矜慎若是

王象春字季木濟南新城人萬歷庚戌進士除上林苑典簿遷南京大理評事歷工部員外改兵

部終吏部郎中有問山亭集

萬歷中年詩派雜出季木自關門庭不循時習雖引關  
中文天瑞爲同調然天瑞太支離未免邪徑害田矣未  
若季木之無戾羣雅也題項王廟壁一篇云三章旣沛  
秦川雨入關又縱阿房炬漢王真龍項王虎玉玦三提  
王不語鼎上杯羹棄翁姥項王真龍漢王鼠垓下美人  
泣楚歌定陶美人泣楚舞真龍亦鼠虎亦鼠比於謝參  
軍鴻門作更覺迺鍊亡友潁川劉考功公馘亟賞之幾  
於唾壺擊缺此非邪師外道之傳也謁岳武穆廟云衰

草寒烟日暮時傷心瞻拜岳王祠君王自得偷安計臣  
子應班痛哭師東海未填精衛死南風不競杜鵑知由  
來和議非長策千古英雄恨莫追石城月云金陵王氣  
未曾消水泊秦淮江上潮月到石頭城下好碧雲紅樹  
聽吹簫不落夾云慈寧宮裏佛龕崇瑤水珠燈照碧空  
四月虔供不落夾內官催辦小油紅

馬之駿字仲良新野人萬歷庚戌進士除戶部主  
事歷員外郎中降廣德州同知升應天府通判  
調順天尋復官戶部主事終員外有妙遠堂集

仲良才頗縱橫微嫌圭黍未合十方禪院云何處堪消  
夏非山卽水鄉樹深渾欲暝花近反無香欲晚波難綠  
迎秋木漸蒼市譁原未遠烟景乃微茫送劉四云別酒  
呼還輟歔歔百感俱兩年何事隔明日此身孤秋水殘  
城郭清霜點驛塗故鄉歸總好高會復能無

陳翼飛字元朋平和人萬歷庚戌進士除宜興知  
縣被劾歸有慧閣長梧二集已未庚申辛酉壬

戊行卷

元朋牽絲百里遽挂彈文坎壈終身賴詩篇以陶冶集

甚繁富幾與明卿伯玉爭多史取一編惜乎未就觀其  
解組記自述與韓求仲偕游金山有詩僧慧秀攜沈孝  
廉虎臣札來謁韓中稱引宜興吳徹如觸韓怒嫚罵吳  
不絕口以慧秀詩挂松枝上斥而遣之慧秀訴之於吳  
時沁水孫尚書居相以御史督運漕吳嗾孫劾之代爲  
草奏辭連鄒臣虎湯嘉賓黨禍旣成元朋一跌遂不復  
振矣錢氏與求仲臣虎元朋皆同籍而列朝詩槩削去  
不錄嗚呼桑海旣遷猿鶴沙蟲悉化而雌黃藝苑者黨  
論猶不釋于懷可爲長太息也

朱大啓字君輿別字廣原萬歷己酉以秀水籍順  
天鄉試中式庚戌賜同進士出身除南昌推官  
擢吏部主事歷員外郎中崇禎初升太常少卿  
轉太僕卿再轉大理卿遷刑部左侍郎卒贈尙  
書有曼寄軒集

東漢風俗之厚期功之喪咸得棄官持服如賈逵以祖  
父喪戴封以伯父西鄂長楊弼以伯母繁陽令楊君以  
叔父上虞長度尙以從父渤海王郎中劉衡以兄思善  
侯相楊著以從兄太常丞譙元槐里令曹全以弟廣平

令仲定以姊王純以妹馬融以兄子皆以憂棄官輕舉  
至晉而嵇紹拜徐州刺史以長子喪去職陶潛以程氏  
妹喪自免作歸去來辭自是而後古之道莫之行也先  
伯祖掌銓東曹聞先文恪公之訃請于朝乞歸持服德  
陵允焉當時典禮者亦不以爲過斯國史所當附書于  
禮志者此事尙未百年今則父母之喪有不去其官者  
矣先文恪以宰輔歸所遺僅墓田七十畝先伯祖五倍  
之恒曰吾官階三品而恒產倍徙于保傳死何以見叔  
父地下鄉黨傳其言數清門者必先吾朱氏焉先伯祖



晚愛結方外社與秋潭萍蹤雪嶠諸法侶游更唱迭和  
故曼寄軒集禪誦之言居多

崔世召字徵仲寧德人萬歷己酉舉人知連州有  
秋谷集

崔君令巴山有爲魏璫祠請頌德詩者峻拒之遂被逮  
入都下獄崇禎初釋還補官桂東尋司浙中鹺務詩頗  
清徹無塵坌氣

孫元化字初陽蘇州嘉定人萬歷壬子舉人從軍  
贊畫由兵部司務進職方主事天啓末閒住崇

禎初起武選員外郎歷官都御史巡撫登萊吳  
橋兵變坐失事論辟有水一方人集

初陽忼慨從軍歷三獨坐當崇禎初環召有兩頭蛇見  
里居樂在堂之南軒賦詩而行詩中自況卒成妖讖其  
外孫侯開國語余公遺集凡百卷詩僅存數篇錄之以  
當志怪其辭云吾聞兩頭蛇其怪不可弭昔賢對之泣  
而我翻獨喜喜者意云何以我行藏似蜿蜒不畱停奔  
赴孰驅使當南更之北欲進掣而止首鼠兩端乎猶豫  
一身兩蛇也兩而一相牽無窮已混心腹腎腸各口頰

脣齒畢生難並趨終朝不離咫伸屈匪自甘左右何能  
以豈不各努力努力徒縈絳殺一誠便一一殺一亦死  
兩存終奈何聽之造物理

卓爾康字去病仁和人萬歷壬子舉人有修餘堂  
集

去病康濟之才著書等身惜不甚傳詩特霧豹一斑爾  
招友吉祥寺看梅云言別長干久相思積雨重忽驚梅  
蕊發如與故人逢入寺幽香繞方春冷豔濃憐君疎傲  
似相對益情鍾

李衷純字元白嘉興人萬歷壬子舉人選授如皋  
知縣升南工部主事轉兵部員外出知邵武府  
終兩淮鹽運使有激楚齋草

都運少以詩文受知於王元美元美集中載有贈詩既  
而上交郭美命從游葉進卿東林諸君子目以俊及筮  
仕雉皋特多惠績立碑頌德者如林其卒也錢氏志其  
墓蓋循吏也吾鄉戚尙寶元佐撰檇李往哲傳語焉勿  
詳近項明府玉荀續之齟使之治績闕而不書慮舊聞  
之放失附識於此

繆昌期字當時常熟人萬歷癸丑進士改庶吉士  
授檢討歷左諭德死奄禍贈詹事諡文貞有從  
野堂存藁

六君子之獄多以攻客魏取禍文貞無言責而黨奄人  
者尤惡之蓋以善謀見嫉也文貞與顧涇陽書云東漢  
南宋之事某感歎於中者久矣互相標榜豈士君子之  
幸哉又與楊大洪書不肖歸矣便可不復出又與葉臺  
山云不入長安門不知世路之險且惡也是亦明哲之  
見而終不免焉命矣夫

周宗建字季侯吳江人萬歷癸丑進士除武康知  
縣調仁和擢福建道御史巡按湖廣被逮死奄  
禍贈太僕卿諡忠毅

魏進忠未更名曰忠毅因水寇卽訟言攻之尋又上言  
乳母不當入宮引王聖趙嬖陸令萱以爲前鑒及德陵  
遣劉朝行邊又言內臣典兵有三不可九害以是客魏  
之黨皆怨公刺骨曹欽程舊知吳江縣事遂希旨誣公  
削奪逮捕考訊九死無屈讎詞云百鍊之剛矣詩亦慨  
當以慷

周順昌字景文吳縣人萬歷癸丑進士除福州推官徵授吏部主事轉員外郎死璫禍贈太常寺

卿諡忠介有燼餘錄

忠介之逮在天啓丙寅三月校尉至知吳縣事陳文瑞持檄詣公公從容談笑入書齋理圖籍見案有素楮爲龍樹菴僧乞書者泚筆揮灑拂袖而出入縣解越三日宣詔聚觀者累萬人巡撫立於左巡按立於右諸生王節等肅而前曰大人有事地方詎不知吏部居鄉立朝者今日人情如此明公獨不爲青史計乎曷不據實上

聞請外臺勘治撫按殷栗不敢諾緹騎手銀鎗擲之地  
大呼囚安在衆怒奮躍而登攀闌折楯毆諸校尉詰曰  
旨何從出曰魏上公於是衆共擊持僞旨者時大雨堂  
下萬屐齊擲緹騎伏撫按脇下一尉匿梁上驚墮而死  
是夜撫按具疏告變捕十三人下於獄論五人大辟五  
人者顏佩韋馬傑楊彥如沈揚周文元文元公與丁也  
佩韋臨刑告知府寇慎曰囚等爲周吏部死死於義非  
爲亂也公旣斃於錦衣獄歸葬白蓮橋南馬家墩崇禎  
初吳人毀魏忠賢普惠祠購佩韋等頭顱合尸葬於是



曰五人之墓太倉張溥爲作碑記先是御史倪文煥首劾公及敗晝見五人戎裝帶劒入其室須臾旌旆導公來庭中石井闌忽飛起轟震而去亦異事也公子茂蘭字子佩嘗鬻指瀝血書疏草訟公冤故邀卹典特優渥子佩高隱不仕鄉人私謚端孝先生其血書副本尙存於家予曾見之爲跋其尾

吳伯與字福生宣城人萬歷癸丑進士除戶部主事歷員外郎中出爲浙江布政司參議遷廣東按察副使有素雯齋集

福生素叟集雖無與竟陵酬和之作似亦降心從之者  
宿姑孰云作客休嗟滯浮生合自勞蘋花三枕對蘆荻  
片帆高生計存書史鄉心寄酒槽夜來寒不禁換却舊  
綈袍

羅賓王字季作番禺人萬歷乙卯鄉薦仕爲南昌  
府同知有散木堂集

季作罷官歸築哭斯堂於里門或怪其誕然方其佐郡  
欲率師勤王居恒忼慨好談天下事及陷身犴獄志不  
少挫詩歌多憤懣之詞亦奇士也

錢士升字抑之嘉善人萬歷丙辰賜進士第一累

官太子太保文淵閣大學士

相君晚達爰立未久旋遂初衣薦丁亂離故其詩多鬱  
轡南園卽事云世情不到處獨寤寐歌時但有雲山入  
兼無樵牧知竹光虛牖白花氣雜林遲不覺斜陽下鄰  
家起晚炊

劉榮嗣字敬仲曲周人萬歷丙辰進士除戶部主  
事調吏部歷郎中累官至工部尙書總督河道  
有半舫集

尙書銜命治河時駱馬湖潰運道填淤乃創挽河之議  
起宿遷至徐州別鑿新河分黃水注其中以通漕運計  
二百餘里費金錢五十萬邳州上下悉河流故道濬之  
尺許皆沙掘之爲河經宿沙落河坎復平迨引黃水入  
波流迅急衝沙而下往往成淤明年漕艘至駱馬湖潰  
流適平運丁惟願入泲不願由新河尙書雖躬督之諭  
以軍法間有入新河者舟輒膠於是南給事中曹景參  
上疏特糾落職提問下獄論辟獄未解而卒朝野之論  
以尙書河渠之任本非所長皆誤信門客之說用違其

才爲可痛惜其後駱馬湖復潰舟行新河人頗稱便焉  
至其詩格卑卑未能遠與古人方駕

萬燦字闇夫新建人萬歷丙辰進士除刑部主事  
調工部歷屯田郎中首劾魏忠賢廷杖流血死  
贈太常少卿追諡忠貞

天啓中忤魏璫慘死者先後一十七人萬公首受其禍  
公初任營繕主事轉屯田郎先管寶源局而陵工其職  
掌也因內官監廢銅不發疏言其姦謂忠賢珠玉盈筥  
金銀滿屋何欲不遂顧此廢爛銅器無足入其目而必

一手握定者其設心以爲不若是無以操天下之利權  
旣操天下之利權不難攬天下之政權臣有以窺其微  
矣疏入矯旨於午門杖一百奄人數十輩螽擁牽衣粹  
髮而前杖後伏小璫於闕下掎擊錐刺踰四日而殞李  
忠毅上言曰爆死矣未報國恩先填溝壑六尺之孤繞  
膝八旬之母倚閭旅櫬無歸游魂戀闕臣僚飲泣道路  
咨嗟然共知非出於陛下之心也臣不暇爲爆寃爲陛  
下冤損好生之德負殺諫臣之名豈所以作忠勸士哉  
夫人臣緘口以待遷厚利也危言以招戮實禍也身死

而天下悲其忠虛名也舍保身家榮妻子之計博此虛名飢不可食寒不可衣將焉用之况乎傷殘父母之遺體以從龍比於九京人非僕隸法非訊囚罪至死刑命非草芥廷杖之舉殊失士心直俟公論明而卹死錄孤嗟何及矣被旨以瀆擾詰責蓋自公死忠賢知外廷之無奈彼何由是鈎黨之獄興而縉紳之禍烈矣

魏大中字孔時嘉善人萬歷丙辰進士授行人歷官吏科都給事中死奄禍贈太常寺卿諡忠節

有藏密齋集

忠節骨鯁之臣然頗畱心風雅里人王屋布衣能詩公  
見其賦秋蘭作爲之擊節值文會公曰孰爲賦秋蘭者  
起而復揖之布衣感公之知公被逮日徒步送之境外  
揮淚而別息游一律云一夜秋聲萬木寒乾坤何處足  
彈冠時名盡向黃金起世事都堪白眼看已自故人嗟  
洛陽更誰同病問加餐風塵伏枕衡門穩行路於今轉  
覺難

陳熙昌字□□南海人萬歷丙辰進士除平湖知  
縣擢吏科給事中



乍浦孤城如彈丸倭寇入犯之衝經國者不置重兵於  
其地綢繆牖戶之謂何陳公作宰在太平之日賦東湖  
雜詩云乍浦瀛壖曲遙連蘆瀝場迎船桑葉白繫纜菜  
花黃塔影開初地鐘聲落上方孤城非鐵甕先事愼隄  
防蓋先有隱憂矣予嘗過其地登湯山山舊有塔寺僧  
持疏募重建予亟語縣令已之蓋洋船望見塔易指點  
入口之路不可不深慮也

李應昇字仲達江陰人萬歷丙辰進士除南康推  
官擢福建道御史死奄禍贈太僕寺卿諡忠毅

有落落齋集

王紹微撰東林點將錄阮大鍼名亦與焉大鍼初與李忠毅魏忠節相善及忠節補吏垣大鍼疑忠節有意逐之遂結傅櫬黨於魏監忠毅猶憶舊交貽之書云昔正叔子瞻一生樹敵到底同鑄黨籍之名若使蔡確之徒欲分收一人以去二君子必不願也可和可爭必不受小人之攀援斯君子之品乃見而大鍼旣投璫幕者已絕於諸君子矣及忠毅被逮於檻車賦詩云細數知交在逍遙各一方魏齊方睥睨阮籍亦猖狂形影悉相弔

音書夢已荒古人不可作搔首問蒼蒼抑何其忠厚之  
深也魏齊指常熟魏浣初阮籍則指大鍼其後居南京  
諸生顧杲等一百四十人草檄討之旣而附馬士英得  
志導之重翻三案誅鉏正人僉壬之反覆真同鬼蜮雖  
有詠懷堂詩吾不屑錄之也已

黃尊素字真長餘姚人萬歷丙辰進士除寧國推  
官擢山東道御史削籍被逮死詔獄贈太僕寺  
卿追諡忠端有集

忠端以考選入都時門戶紛爭多以挺擊紅袍移宮三

案占人向背客問公以三案如何決擇公曰光宗棄羣臣久今上御極亦非一日三案皆往事恐朝廷所急不在此客無以難也又曰上未登極之先移宮爲是御極之後安選侍爲是二者祇爭先後不分是非斯皆持平之論惟公之立朝不亢不阿專事補救令楊魏二公從之禍豈若是其酷乎崇禎初死奄禍諸臣止諡及高楊魏周四公論者多咎姚文毅之過刻公與萬左袁顧繆李及三周公久而易名諡法守禮執義曰端君子以爲宜文文肅作神道碑銘云於惟黃公憂來無方惕號同

志戒其用剛蓋得其實也

袁中道字小修公安人萬歷丙辰進士授徽州府  
教授遷國子博士升南京禮部主事歷郎中有  
珂雪齋集

小修才遜中郎而過於伯氏郢中送春曲云總以堂堂  
去何容緩緩歸隔溪鶯對語掠水燕雙飛野草香沾屐  
修篁翠溼衣山花一樹好游女摘來稀七夕同彭長卿  
中郎云清談閒送可憐宵竹戶斜通宛轉橋白水青林  
秋澹澹好風涼月夜蕭蕭貧來野客傷時序老去詩人

怨寂寥驚鳥不鳴更漏靜如聞銀浦弄輕潮

沈德符字虎臣一字景倩秀水人萬歷戊午舉人有清權堂集

孝廉生稟異質日讀一寸書所撰萬歷野獲編事有左證論無偏黨明代野史未有過焉者其詩寧取公安竟陵欲盡反歷下瑯琊之弊故多豔字側辭雪颯星碎未免病於才多也人日一律云挑菜傳人日山邨樸未知雪深添酒券風橫緩燈期歲事因貧略春光過閨遲梅園縱深閉宜賞寂寥時天啓宮詞云二廣雙甃陣脚牢

靜志居詩話

卷十七

圭

揚務山房

御營日麗戰雲高封章臺瑣俱休進萬乘臨戎正內操  
自注唐以左右神策軍爲二廣歲除舊例幸椒房中尉  
今宵別上觴角觝互呈宮漏短便陳庭燎御明堂白驪  
唐代御元宗辟後將軍始受封爭似生叨三品料驪駒  
賜號小烏龍

姚希孟字孟長長洲人萬歷癸未進士改庶吉士  
授檢討歷左贊善左諭德出爲南京少詹事卒  
贈禮部右侍郎諡文毅有公槐響玉棘門沆瀣  
秋旻文遠循滄松癭伽陵風吟等集

逆案將定思陵發建祠稱頌諸疏申命內閣詳閱限以  
數日確議來奏輔臣難之求助於文毅文毅中夜不寐  
周步堂中其客周生進而問公公語之故生曰某於七  
年中逆知魏客之必敗以諂附諸臣分別其罪自謂無  
道情公取而權衡之可乎公覽之擊節稱善次日進於  
輔臣皆以爲當據之入奏生吳江人或曰秀才永年安  
期或曰永年之弟永言安仁也爰書既定天下咸服凌  
遲處死者二人擬斬者二十五人充軍者十一人贖徒  
者一百三十一人冠帶閒住者四十四人雖有漏網然



吞舟之魚鮮矣

顧錫疇字九疇崑山人萬歷己未進士改庶吉士授檢討天啓中削籍崇禎初以原官起用歷贊善諭德掌司經局遷國子祭酒假歸補少詹事起禮部左侍郎升尚書有握日草

建文四年事蹟革除之後文獻俱不足徵相傳長陵用王景議葬以天子之禮然鍾山之麓一坏安在祀典無聞則其說妄也其曰葬之西山既不封不樹矣安得又表曰天下大師之塔要其說更妄也自宏治中禮部主

事楊循吉首請追諡建文君隆慶初東莞布衣譚清海  
請復革除年號告之高廟而追上建文君諡萬歷中通  
政使沈子木國子司業王祖嫡禮部尙書范謙給事中  
楊天民御史牛應元先後進言得旨存其年號崇禎中  
繼以給事中張國維禮部侍郎呂維祺給事中沈允培  
駙馬都尉鞏永固而褒卹之典久而未舉迨顧公典禮  
容臺始定議建文君諡曰嗣天章道誠懿淵恭覲文揚  
武克仁篤孝讓皇帝廟號惠宗馬后曰孝愍溫仁貞哲  
睿肅烈襄天弼聖讓皇后尋追贈死節諸臣子諡贈

太師者文學博士方孝孺魏國公徐輝祖贈太保者兵  
部尙書鐵鉉禮部尙書陳迪刑部尙書暴昭御史大夫  
練子寧贈太子太保者禮部侍中黃觀戶部侍郎卓敬  
副都御史茅大方贈刑部尙書者大理少卿胡閏贈詹  
事者衡府紀善周是修贈禮部侍郎者翰林修撰王叔  
英贈副都御史者浙江按察使王良贈太常卿者刑科  
給事中黃鉞贈太僕卿者御史高翔曾鳳韶蘇州知府  
姚善贈太僕少卿者知沛縣事顏伯瑋贈大理少卿者  
谷府長史劉璟贈翰林待詔者金川門卒龔翊及伯瑋

子有爲贈禮部員外郎者濟陽儒學教諭王省贈平陽  
伯者都指揮瞿能贈含山伯者都指揮朱鑑贈指揮使  
者燕山衛卒儲福諡文正者方孝孺諡文貞者黃觀諡  
文忠者王叔英諡忠襄者鐵鉉諡忠烈者陳迪胡閏景  
清諡忠貞者練子寧卓敬徐輝祖諡忠毅者曾鳳韶王  
良諡忠獻者黃鉞諡忠惠者姚善顏伯瑋諡忠愍者茅  
大方高翔諡忠義者儲福諡貞毅者周是修諡貞烈者  
王省諡剛烈者暴昭諡剛節者劉璟諡襄烈者瞿能諡  
壯烈者朱鑑諡安節者龔翊諡孝節者顏有爲以上公

論交孚此外得諡者又五十二人曰節愍齊泰黃子澄  
張昺盧原質葉福也曰介愍胡子昭也曰忠愍俞逢辰  
也曰直愍宋徵也曰肅愍周璿也曰貞愍鄒瑾譚翼石  
撰陳思賢也曰穆愍陳彥回林嘉猷也曰襄愍王度也  
曰果愍邊昇葛誠也曰翼愍金有聲也曰莊愍樊士信  
張彥方也曰忠莊王彬也曰惠莊向朴也曰貞莊鄭華  
也曰毅節林英也曰莊節周季瑜也曰惠節鄭恕也曰  
義節唐子清也曰忠節陳性善也曰忠介程本立也曰  
莊介韓永也曰忠毅高巍也曰清毅郭任也曰毅直戴

彝魏冕巨敬也曰端直程通也曰貞直杜奇也曰忠貞  
侯泰也曰貞勤謝昇也曰貞確徐子權也曰貞達盧迴  
也曰貞穆林右也曰貞定甘霖丁志方也曰剛烈連楹  
也曰端果龔泰也曰莊景陳繼之也曰果義黃謙也曰  
文忠陳忠也其中不無濫及蓋不能不惑於野史之紀  
述然如梁田玉史仲彬輩不與則不可謂顧公無卓識  
也首陳其說者萬公元吉佐其事者李公清惟是吾鄉  
高太常遜志卹典闕焉後之君子覈其實而損益之可  
矣顧公致仕歸晚入閩道出溫州爲悍帥所殺詩罕流

傳錄其題扇一絕云臨安宋故都荷花仍十里際曉湖  
光平鳩鵲鳴不已

侯恪字若樸商邱人萬歷丙辰中會試己未殿試  
進士出身改庶吉士授檢討削籍崇禎初起右  
中允歷諭德庶子出爲南國子祭酒有遂園詩  
集

侯公以史官秉南董之筆爲逆奄所惡晚又忤烏程相  
移畱都洵古之遺直也詩以大雅自命嘗言詩自三百  
篇後存亡者三漢魏存矣六朝亡也唐存矣五代宋元

亡也國朝正嘉存矣今又亡也其持論深惡新體伸北地信陽而抑嘉靖七子尤痛詆公安竟陵流派云

高道素初名斗光字明水一字如晦更字元期嘉興人萬歷己未進士除工部主事歷郎中以督造桂府殿傾論死有景元堂詩集

水部才思兼人不以格律自拘古今詩皆超詣五律尤爲長城當桂藩分建奉命將作南方卑溼薄櫨甫新大璫亟事丹堊水部力爭不得旣而雷震桂傾吏議周內遂罹顯戮聞者冤之



艾穆字和甫一字純卿岳州平江人嘉靖中舉人  
初仕爲國子監助教萬歷初遷刑部主事歷員  
外郎抗疏論張居正奪情廷杖遣戍西寧久之  
起補光祿少卿轉鴻臚寺卿再轉太僕寺卿以  
都察院右僉都御史巡撫四川有終太山人集  
艾公與吾鄉沈純甫先生同論江陵奪情其謫戍一西  
一南艾公出都詩云病向西風一促裝寥寥征鴈塞雲  
長流沙萬里無愁遠去國孤蹤信若狂楚客江魚身可  
葬漢臣馬革骨猶香青山到處皆吾土豈必湘南是故

鄉是亦達人之言西竄之後詩律頗效空同自公而後南風多死聲矣

屠本峻字田叔鄞人尙書大山子承廕官太常寺典簿歷南禮部郎中出爲兩淮運司同知移福建運使有屠田叔詩草

田叔好詼諧詩多不拘格律晚節歸田愛客益甚鹽豉蒜果觴客必盡歡守辰州日禁民殺牛有唐生牒言家貧畜一牛不幸死請鬻其肉田叔度其僞也判以俸錢買牛葬之牽至乃生牛因命小吏飯之及解官衣深衣

騎馬出門州父老泣相送牽牛隨其後時人爲作辰陽  
畱犢圖年旣老好學不倦或曰先生老矣奚自苦爲答  
曰吾於書飢以當食渴以當飲欠伸以當枕席愁寂以  
當鼓吹未嘗苦也因自稱慙先生亦曰幽叟起生壙于  
甬上撰狀及表年八十餘乃卒至今甬東言風流儒雅  
輒首及之

吳詔相字廷承宣城人由舉人萬歷初知汝州有  
吳汝州集

臨川湯義仍爲廷承作傳述其生而不慧旣就塾日記

千言縣試令訝其幼謂曰童子豈外黃兒邪應聲答曰  
明府比中牟令矣令竦然異之廷承嘗夢紫衣人指點  
一閣道中松柏葱青數里及知汝州果有閣道松林中  
歎曰命止此邪因慵於治事未秩滿稱病瘖去歸見其  
母抱持大哭失聲疾遂愈丁母憂未終喪而卒存詩雖  
無幾近年編續宛雅者竟遺之惜也

費懋謙字民益鉛山人襲廕官南京都察院經歷  
民益褰屣子弟綽有詩名兼善山水梅竹青溪社集實  
首倡之相逢一篇源出繁欽楊方其詞曰與君相逢處

乃在青溪濱何意溪頭柳能令傷客神與君相逢處乃  
在邀笛閣何意笛中曲能令心不樂與君相逢處乃在  
射堂上何意堂前月勞勞生夢想與君相逢處乃在冶  
城宮何意冶中劍飛躍各西東我昔承清盼君亦憐我  
姿願以朱絲絃報君青桐枝終日不成縷對君空自持  
願以江干菼報君蘭蕙芳終日不成羽對君空自將願  
以青玉盃報君金琅玕終日不成琢對君倚長歎願以  
錦繡段報君貂襜褕終日不成章對君長煩紆贈君愛  
流晷我亦慎區區所貴各努力聚散誰能無中情旣款

款徙倚亦何須古人皓首言君諒我不殊

王敬臣字以道長洲人參政庭子講學於吳以薦授國子監博士學者稱少湖先生有俟後編附詩

博士講學不立異同以躬行爲本詩其餘事務去擊壤陳言更難得也

莫是龍字雲卿以字行更字延韓松江華亭人如忠子以諸生久次貢入國學有莫延韓遺藁

廷韓少謁王道思於閬道思贈以詩云晝舫夜吟令客

駐練褰畫卧有人書然詩篇書法皆不見出羣五律稍  
勝登潤州城樓云高閣俯城陰松篁一徑深晴雲搖海  
色夕梵起潮音古戍關門斷山程驛道侵江流無日夜  
南望是鄉心贈任城故知云此別何疎濶風烟宛昔游  
馬頭芳草路柳外木蘭舟易隔三年夢難期十日畱任  
城今夜月閒殺酒人樓

甯祖武字仲先吳江人以貢生官肇慶通判有迂  
公詩草

別駕未晚投簪娛情泉石預營繭室自爲之銘號曰迂

邱嘗欲買木版以覆塵几思送死棺所必需匠人告以  
元日往購則木商不計值且有酒果相邀別駕遂以是  
日就肆飲酒醕果而回鋸木以覆几焉題詩云元日治  
凶具人情良獨難生以覆几塵死伴歸空山是亦達人  
之高致矣別駕詩多率易錄其二首知非真迂者新安  
夜泊云芳草綠如此征塗尙未窮隔江商店火近市酒  
旗風人語邨邨異雞聲處處同不須愁落魄人世總飄  
蓬吳江竹枝詞云唐家坊藕太湖瓜消暑水肌透碧紗  
水上納涼何處好垂虹亭子看荷花



陶允嘉字幼美會稽人承父大順廕官鳳陽通判

有澤農吟

幼美體弱然無塵坌之氣符離懷古一篇云張都護殺  
曲端關中將士皆心寒秦丞相殺岳飛萬里中原一旦  
隳婁室歡顏兀兀喜小朝廷復何恃長腳太師吾何尤  
魏公九原知悔不惜不令淳熙諸君子見之

龔昂字懋卿章邱人以歲貢生官江都訓導轉威  
縣教諭再遷開平衛教授有襲懋卿集

懋卿少貧牧羊豕山中手書卷不釋旣而小吏誣其逋

租受笞益發憤力學見李中麓以詞曲名恥之銳意學  
古文辭時稱爲醇謹君子

謝三秀字君采貴竹人萬歷間學官有雪鴻集

君采詩甚清穩由其生於天末習染全無此黔人之軼  
倫超羣者安莊夜聞警云鼙鼓中宵急愁聞戰伐頻數  
家出煨燼一郡入荆榛地亂難爲客塗窮恥傍人披衣  
待明發華髮鏡中新西菴徑中萬竹翛然喜賦云負杖  
入深竹一盤仍一盤鄰僧分路去野客到門看不雨夜  
尤綠無風夏亦寒素琴多遠思宜對此君彈

靜志居詩話

卷十七

三

扶荔山房

吳稼澄字翁晉孝豐人維嶽子以例除南光祿典簿累遷雲南通判有元蓋副草又北征南諧滇游諸橐

翁晉樂府如健兒騎駿馬左右馳突靡不如意近體頗合西崑歸自滇南里居極絲竹雲林之趣自號大滌先生病革語其子以布衣幅巾歛謂如此庶足以見疇昔詩人於地下蓋以貲郎自懲云秋懷云金荊爲枕紫荊牀已共秋塵委曲房燈下有情啼絡緯機中無夢到鴛鴦明星爛爛愁天老燭火離離歎夜長一樹桐花零落

盡可憐梧子自經霜重局落葉迴相依羅袂無聲事已  
非寶鏡欲開鸞自泣玉釵初斷燕猶飛旅葵未合生空  
井苦槩真堪染故衣滿目清秋何所似白雲愁色遠微  
微

華善繼字孟達無錫人仕爲浙江布政司都事遷  
永昌通判有折腰漫草

孟達詩不及其弟雨後一律云高樹畱殘雨層城帶晚  
烟厨香菰米熟架滿豆花鮮未改狂奴態還爲長吏憐  
不因公事暇卽賦白雲篇

靜志居詩話

卷十七

三

扶荔山房

華善述字仲達無錫布衣有被褐先生詩藁

仲達與兄善繼孟達並有才名王元美列其兄於四十子之列而仲達不與焉觀其詩品矜奇灑落幾欲御風而行一時詞客末或過之而元美序之謂不可爲典要是亦拘牽之論已長相思云長相思相思長幾許黃河三三曲曲通牛渚巫山六六峰峰度神女枯槎不來雲不雨夢落風波安可語旅懷云萬里秋將盡孤舟夜未殘獨愁成淚易清夢欲歸難雁落繁霜白鷗飛片月寒朝來行客鬢映水默相看

梅守箕字季豹宣城縣學生有居諸前後集

梅氏一門羣從禹金最負時名嘗後先過王元美元美  
贈之詩云從誇荆地人人玉不及梅家樹樹花季豹爲  
禹金從父譽雖稍遜禹金然詠懷諸作恐小阮亦當避  
席也詠懷云飛閣臨馳道櫺軒俯四隅遠望可當歸何  
以心不娛夾蒼灌叢莽第宅成邱墟魍魅嘯中林夜啼  
猿與烏密親不我與我友不我俱拊劒明所懷託情於  
素書愛極翻自疑驩極易以悲所以樂莫樂固在新相  
知皎皎中天月虧盈尙有時惠思念疇昔忉怛無好懷

靜志居詩話卷十七

三

扶荔山房

歲暮空堂上明星照我扉身各天一隅安知渴與飢慰  
我同心人膠漆未可期索處無適懷羣居與怨尤素交  
夙已盡閭閻起相仇甘醴善逆人終始寧爲謀同心託  
蕭艾一器戒薰蕕匿怨而友人見鄙於左邱信哉朱穆  
言獲我心所求

梅鼎祚字禹金宣城人國子監生有鹿裘石室集  
禹金周見洽聞著書甚富詩乘文紀之外旁及書記小  
說兼精傳奇所填韓君平玉合記爲詞家所賞有云風  
中絮陌上塵歎韶光何曾戀人亡友王介人極稱之

梅蕃祚字子馬宣城人鼎祚從弟官寧鄉主簿有

涉江草王程草

子馬與季豹禹金同負詩名王元美詩較他羣從更高  
華蓋指子馬言也然非季父賢兄之比

宋登春字應元新河人有鵝池生集

王喬之玉棺桓司馬之石椁可以諡曰至愚然而楊王  
孫之僕葬劉伯倫之荷鍤便埋亦矯枉之過也鵝池生  
語邢子愿云君視宋登春豈杉柏四周中人行將浮錢  
塘脫履江干乘潮解去旣而果躍入江魚腹之葬果勝



於一坏之土乎君子譏其誕矣生詩平淡寡深思不失  
爲賈浪仙李才江一流秋日野望云聽鳥中林性看雲  
故國心地卑湘漢濶天遠洞庭深老馬空知道窮猿豈  
擇林十年書劍客寂寞到如今

陳昂字雲仲莆田人有白雲先生集

山人以倭亂率妻子奔豫章織草屨易粟不給則賣卜  
已而入楚蜀轉客金陵間賣文爲活阨窮以死其自序  
略云昂於詩尤嗜五言第家貧無書誦王右丞作卽師  
右丞誦杜工部作卽師工部可謂多師以爲師者也宿

江邊閣云暝色江邊閣行吟易斷魂風前兩岼葉月下  
一聲猿夜哭誰家婦寒號何處邨洞庭春水動雇艇去  
荆門移居巴陵云此卽巴邱成相傳魯肅城古今餘往  
事兵火剩殘生楚水爲漁使湘山結室平地靈如獲託  
亦足寄遐情

馮遷字子喬上海人有長鋏齋橐

子喬詩出辭似淺而鍊格頗迢澗之汰之沙礫自去迭  
唐世其北上云君去青山外予吟綠水邊忘機鷗性狎  
快意馬蹄穿魏闕通霄漢吳臺思管絃遙知聽雨夜定

憶小樓眠

柳應芳字陟父海門人有柳陳父集

陳父僑居金陵之杏花邨每出行吟俛首沈思觸人肩面不自覺語所知曰作一詩必離魂數番乃得稱意昔人所云撚斷數莖髭用破一生心不過是矣其詩頗選高格第去七子仍未遠春閨云黃鶯不隻啼紫燕還雙棲棲在妾梁上啼向妾窻西

聞龍字隱鱗鄞縣人處士有行藥吟幽貞廬詩集隱鱗爲冢宰莊簡公孫以孝友德行聞於鄉里初不以

韻語自負然其近體頗間整特少警拔耳山居卽事云  
積雨朝來歇諸溪盡急流隔河看飲犢倚檻有浮鷗雲  
冷松根石風微竹外樓蕭然無一事開徑遲羊求送趙  
彥忠游吳興云吳興舊游地遠想尙依依荻旂青簾舫  
桑林白版扉計程千里近屈指一年違從此斜陽外看  
山悵獨歸

靜志居詩話卷十七